

La Quotidiana 5-3-2015, p. 9

La giuventetgna s'engascha per la famiglia

■ (cp) La pcd giuvna dal Grischun ha fixà las parolas per las votaziuns da dumengia proxima. Sin plaun naziunal sustegna ella l'iniziativa da la pcd per la famiglia e refusa quella dals verd-liberals «Taglia sin l'energia empè da la taglia sin la plivalur». Sin plaun chantunal è la pcd giuvna per ereger ina mensa e mediateca, inclusiv locals per proteger bains culturals a la scola chantunala.

Cun l'iniziativa da la pcd svizra vegn finalmain realisà che supplements per uffants ed en scolaziun èn liberads da la taglia. Già 2008 aveva cuss. fed. *Hans Rudolf Merz* annunzià – suenter la refurma da taglia per interpresas – da vulair stgargiar las famiglias. La pcd giuvna dal Grischun è numnadain da l'opiniun che far pagar taglia sin supplements per uffants e scolaziun saja stà in sbagli da construcziun.

Perquai manegia *Tino Schneider*, co-president da la pcd giuvna grischuna: «I n'ha zunt nagin senn da dar l'emprim in sustegnement finanziel ed alur privar en in segund pass dad ina part da quest agid.»

A la pcd giuvna datti oravant tut da pensar ch'autras partidas na sustegnan be ord ponderaziuns politicas betg ina iniziativa che fa propi senn, malgrà ch'ellas èn s'engaschadas pli baud per talas u sumegliantas propostas era cun inoltrar ellas sin plaun federal e chantunal.

La giuvna pcd dal Grischun è medemamain per ereger ina mensa e mediateca – inclusiv locals per proteger bains culturals – a la scola chantunala a Cuir. Igl è urgentamain necessari ch'ils provisoris da fin qua vegnian remplazzads da localitads modernas. Per pudair alimentar fin 1000 scolaras e scolars en in lieu è ina mensa moderna indispensabla. Era dat ina mediateca moderna access a las medias digitalas e prepara scolaras e scolars – sper in emprendissadi – era per ir a l'universitad.

Severin Geisseler, co-president da la pcd giuvna, è persvadi: «Tgi che vul sa scolar per l'avegnir è dependent dad ina correspondentia plattafurma d'infurmaziun e barat sco ella vegn purchida dad ina moderna mediateca digitala.»